



Sabtu, 27 Maret 2021

Ogen: Johanes 10:11-4



"Permakan Situhu-tuhu"



Ngerana kita kerna permakan, mabai kita kuba pengangkan kerna pemimpin. Permakan eme pemimpin, simabai sinipermakani ntah ipimpinna kuba kiniulin. Adi kita nggo tek nandangi permakan e, emaka kai pe nina permakan e sidalanken, sebab permakan situhu-tuhu nggit ngasamken kesahNa guna biri-biri e (ayat 11). Adi sekalak upahen ia labo simpuna biri-biri e, maka pasti ia nadingken biri-biri e adi idahna serigala reh tapi permakan situhu-situhu nggit berkorban man biri-birina e, sebab ia empuna. Lalit manusia si banci jadi permakan situhu-tuhu seakatan Bapanta si i surga. Emaka kita arus tetap erlajar man bana, ngusih biak-biakna gelah sinipermakani kita subuk jabu, perpulungen bagepe kalak sinipimpin kita nggejabken kenyamanan, ketentramen ras kiniulin ibas kerina dampar geluhna. Ibas dampar sideban kita kalak sitek selaku biri-biri, sitandailah permakanta e. Ikutken katana, setia ras patuhlah man bana. Permakan situhu-tuhu mabai kita nggeluh rembak ras Dibata. Ikutkenlah permakan e, jadilah biri-biri simehuli dengen ula sempat salih jadi kambing si labo terbabai. Bagi nina kuan-kuan, ula bagi mabai kambing adi arah lebe nadau adi arah pudi ngegah, arah apai pe la terikut-ikut. Ula kal sempat bage biakta selaku kalak siipermakani. Ula lepak perdalanta sebab permakan ta e nandai kita siugapana pe kita. Adi permakan situhu-tuhu simipermakani kita, idaramina kita tapi adi permakan upahen, labo diatena. Metengetlah, sabab la sitik gundari enda permakan-permakan upahen si perayakenna kerna diri ras kepentingenna saja. Labo keleng kal atena biri-birina. Labo nggit ia ngasamken kesah guna kiniulin biri-biri e. Permakan situhu-tuhu e engkelengi kita sebab kita me biri-biriNa simehnergana kel ilebe-lebeNa. Ibabaina kita kulau siteneng permalerna, ku mbal-mbal simeratah dengen ibas kerina situasi iarak-arak ras ikawalina.